



**Här Claude Wiseler**

**President vun der Chamber**

**Lëtzebuerg, de 16. Oktober 2024**

Här President,

Esou wéi den Artikel 80 vum Chambersreglement et virgesäit, bieden ech Iech, dës parlamentaresch Fro un den Här Educationnsminister weiderzeleeden.

Aus der nationaler Presse vum 15. Oktober geet ervir, dass d'Gemeng Miersch mat engem akute Platzmangel an de Maison relais an de Betreuungsariichtungen ze kämpfen huet. Sou ass gewosst, dass fir d'Kanner déi ab hirem drëtte Joer an d'Précoce kënne goen, keng deementspreechend Platz an de Maison relais kréien. Doraus erschléisst sech, dass Elteren déi vollzäit schaffen an net kennen op d'Hëllef vun der Famillkënnen zrëckgräifen, hier Kanner net an d'Précoce kënne schécken a gezwonge sinn op Crèchen oder Dagesmammen zrëckzegräifen, wat substantiell finanziell Konsequenze fir déi jeeweileg Familien huet.

An deem Kontext wollt ech folgend Froen un den Här Educationnsminister stellen:

- Wéieng Mesurë geséit den Educationnsminister fir fir an Zukunft e sou een Platzmangel ze verhënneren?
- Gëtt den Edukationnsminister de Gemengen Virgaben zum Ausbau vun der Offer, fir sécherzestellen, dass all Kanner Zougank zu enger öffentlecher Betréiung hunn?
- Op wéi enge Krittere kréien d'Kanner zu Miersch, an och an anere Gemengen, déi op enger Waardelëscht stinn, eng Platz an der Maison relais?
- Aus besotem Artikele geet ervir, dass d'Gemeng Miersch net aleng mat dem Problem géing stoen. Kann den Educationnsminister déi Ausso bestätegen? Wa jo, wéi vill Gemengen si konkret vum Platzmangel an de Maisons relais betraff?
- Huet de Minister Zuelen vun de privaten Offren a Kenntnis doriwer ob et och an de privaten Betréiungsstrukturen Waardelëschten gëtt?

Här President, ech bieden Iech, mäin déifste Respekt unzehuelen.

Jean-Paul Schaaf

Députéiert

A handwritten signature in black ink, consisting of several loops and a long horizontal stroke extending to the left.



**Äntwert vum Minister fir Educatioun, Kanner a Jugend, Claude Meisch, op d'parlamentaresch Fro  
Nr. 1380 vum honorabelen Deputéierte Jean-Paul Schaaf**

**Ad 1)**

Et sief bemierkt, datt den Ausbau vun de Plaze fir Kanner an der non-formaler Bildung am Regierungsprogramm 2023-2028 virgesinn ass an et ass eng vun de Prioritéite vun der Regierung, datt all Kand soll kënne seng Plaz hunn an engem Betreuungs- a Bildungsservice (SEA). Et lafen eng Rei Reflexiounen, fir Léisungen zur aktueller Problematik ze fannen a fir de Familljen hire Besoinen entgéintzekommen. Wéi am Regierungsprogramm indiquéiert, ënnerstëtzt de Staat d'Gemengen an d'Gestionnairen an hire respektiven Demarchen. Deementspriedend sinn déi finanziell Ënnerstëtzung vum Staat fir d'Gemenge beim Bau vun SEAsen schonn erhéicht ginn.

**Ad 2)**

D'Gemengen oder och privat Prestatairë këmmere sech ëm d'Schafe vu Plazen an de Betreuungs- a Bildungsservicer. De Ministère fir Educatioun, Kanner a Jugend (MENJE) gëtt keng Virgaben. Et wäerten awer Concertatioune gefouert gi mat de betraffene Parteien an ënner anerem mat de Gemengeresponsabelen, dëst am Kontext vun der Volontéit vun der Regierung, d'Kannerplazen an den SEAsen auszubauen.

**Ad 3)**

D'Prioritéitscritèrë gi vun den SEAs selwer definéiert a ginn net vum MENJE festgeluecht. Dëst gëllt souwuel fir déi konventionéiert wéi och fir déi privat Strukturen. Dofir variéieren d'Prioritéitscritèrë jee no SEA. Critèrë betreffend d'Plazeverdeelung si weeder am Gesetz nach an engem groussherzogleche Reglement festgeluecht. Deementspriedend ënnerläit et net dem Ministère, hei Critèren ze fixéieren. D'Gemengen an déi respektiv Gestionnaire setzen dës selwer fest.

**Ad 4)**

D'Waardelëschte ginn direkt vun de Gestionnaire vun de Betreuungs- a Bildungsstrukturen geréiert. Dofir huet de MENJE keng strukturéiert Informatiounen iwwert e Mangel un disponibele Plazen. Fir deem entgéintzewierken, gouf am Mäerz 2024 eng Ëmfro bei den SEAs fir Schoulkanner lancéiert fir erauszefannen, wéi vill Kanner keng Plaz konnte kréien; d'Zil dovun ass, erauszefannen, wéi vill Kanner op de Waardelëschte stinn an de Besoin u Betreuungsplazen ze erkennen.

D'Resultater vun der Ëmfro, op déi 66 % vun den Haiser geäntwert hunn, hunn erginn, datt a 34 Gemengen an op d'mannst engem SEA Kanner op der Waardelëscht stinn. Et ass awer och ze ernimmen, datt d'Analysen, déi op Basis vun der Facturatioun vum CSA gemaach goufen, weisen, datt am Abrëll 2024 6.387 Plazen uechter d'Land net besat waren.

## Ad 5)

Et sief drun erënnert, datt déi meescht non-formal Bildungsstrukturen e privaten Träger hunn, eng ASBL oder eng Entrepris mat kommerzieller Ausriichtung. Verschiddener sinn och vun der Gemeng selwer geréiert. Et ginn also och privat Betreuungs- a Bildungsstrukturen, déi Waardelëschten hunn.

Am Aktivitéitsbericht vum MENJE ass ze liesen, datt déi gesamt Offer u Plazen am Secteur vun der non-formaler Bildung (SEA, Mini-Crèche an Assistantes parentales) vu 64.424 Plazen am Joer 2022 op 68.400 Plazen am Joer 2023 geklomm ass. Dëst entsprécht enger Erhéijung vu 6,2 % par rapport zum Joer virdrun. Et ass ze präziséieren, datt eng selwecht Plaz vu méi Kanner, natierlech zu ënnerschiddlechen Zäiten, ka besat ginn.

Vun dese Plazen ass en Total vu 47.391 Plazen fir Schoulkanner reservéiert. Well de Gestionnaire selwer kompetent ass fir d'Gestioun, huet de MENJE deemno keng Gesamtvue vun de Waardelëschten.

Lëtzebuerg, den 19. November 2024

De Minister fir Educatioun,  
Kanner a Jugend

(s.) Claude MEISCH